

Valentin Cavegn-Peder, Rueras



A s.Giachen, Rueras, annunzia il zenn la mort da nies convischin Valentin Cavegn. Suenter greva e liunga malsogna ha il Segner clamau el a casa e spindrau el da tuts mals terresters.

Il Gion Valentin Cavegn ei naschius ils 30 d' avrel 1936 a Sedrun. Ses geniturs ein stai Placi Cavegn e Victoria naschida Deragisch. Ella vischinonza dil Cadruvi ha el passentau ensemes cun ses sis fargliuns ina ventireivla affonza cun tut sias bialas e legreivlas varts, mo era accumpignadas da muments trests e grevs. Cun buns talents eis el semess en a far igl emprendissadi da miradur tier la firma Murer e per part en claustra a Mustér.

Igl onn 1963 banduna el la patria e serenda a Reiden e dus onns pli tard a Lucerna. Igl onn 1966 marida il Tin l' Antonia Peder oriunda da Rueras. Els secasan a Kriens. Ina feglia ei il plascher dalla giuvna famiglia.

L'encarschadetgna per la patria lai returnar els a Rueras igl onn 1987. Lavur anfla el sin siu mistregn tier la firma Murer.

Biars onns ha il Valentin da sbatter cun la sanadad. Il dies ha fatg fastedis e schizun ina leva attacca dil cor engraviescha il Tin. Avon in onn sto el sesutametter ad ina greva operaziun. Quella sposa taluisa las forzas ed el po buca pli serevegnir. Ils 28 d'uost 1996 fa la mort ina fin cun tut mal e pitir - il Segner ha clamau.

In grond diember da parents e vischins han surdau el ils 30 d'uost alla fossa sin santeri da s.Vigeli. El ruaussi en pasch.